



27. septemeri 2016

UKA2016/123

**Aalisarneq pillugu Inatsisartut inatsisaata allanngortinnera pillugu Inatsisartut inatsisaat nr. xx, xx.xxx 2016-imeersoq. (Aalisarsinnaanermut akuersissutinik tunniussisarnerup kommunalbestyrelsinit nuunneqarnissaa pillugu aalajangersakkamik eqqussineq).**  
(Aalisarnermut, Piniarnermut Nunalerinermullu Naalakkersuisoq)

Aalisarneq pillugu inatsisartut inatsisaata allanngortinnissaa matumuuna saqqummiunneqartoq oqaaseqarfignissavarput.

Ilaaniigooq nunaqarpoq inuuffikkuminaatsumik kisianniliigooq taakkunani najugallit aporfissarpassuaqaraluarlutik inuupput ilaatigut maniguullutik ataqinnillutillu. Sullinneqarpunngooq tupinnartumik inuuniarnerannut naleqqutsinngitsumik, aammamigooq aalisartortai piniartortaa lu oqarfigineqartarsimapput aalisartunngooq piniartullu amerlavallaarmatagooq akuersissummik pissappata tunineqarsinnaanngitsut, aammamigooq siorna saarullinniarsimanngimmata, nipisanniarsimanngimmata, qaleralinniarsimanatillu allagartamik tunineqarsinnaanngitsut, uffalugooq allamik inuussutissarsiuuteqanngitsut. Aammagooq oqarfigineqartarsimapput, allamik periarfissaqanngikkuit pisassaninngooq qaleralinnik tuniniakkanik pisisinnaavunga, uffalu akissaqarnanga umiatsiaranngumik qimussimillu aalisarniarsaralunga inuussutissarsiorusukkualartunga. ikiorserneqarusukkumagooq socialimukaannassaanga, tupinnaqaarmigooq inuuniarnikkut atugaat aallaavigineqarpallaaratik sullinneqartarsimammata. Aammamigooq nunarsuarmioqataasuninngooq allanik nungusaasutut atuipiluttutullu taaneqaaqqinagatta allagartartaarsinnaanngilagut.

Una atuagara immaqa paasineqarsinnaavoq oqaluttualiatut.

Kisianni taamaanngilaq ilumoortuminguna allagaq maani misilittakkagut inuillu eqqorneqartut apuuttagaat tunngavigalugit.

Taamaattuminguna aalisarnikkut piniarnikkullu atugassarititaasut inunnut pineqartunut pitsaasumik ingerlanissaat pingaartillugu Partii Naleqqamiit oqariartuutigiuartaripput.

Sapinngisamik aalisartunut piniartunullu sullissinermi aporfiit piarlugit inuussutissarsiornerisa ingerlalluarnissaat anguniagassaa juartariaqarpoq, pingaartumik aamma ilaqutariippasuit aalisarnermik piniarnermillu inuussutissarsiornermik tunngavillit inuuniarnerminnut tunngavigilluinnarmassuk.

Taamaattumik kommuninut akuersissutinik nuussinissaq aalisartunut piniartunullu sullissinermi inuussutissarsiornerannullu aporfiusinnaasut piarneqarnissaat, sukkanerumillu sullissilernissaq pillugu tamakkiisumik taparseripput, inunnut taakkununga pingaartorujussuummat, aammalu nunami inuussutissarsiornermi suliffeqarnermilu aalisartut piniartullu ingerlalluaraangata malunnarluartumik nunap aningaasaqarneranut sunniuteqartarmat.

Allaffissornikkut suliassat suli ikinnerulernissaat tassalu akuersissutit eqqarsaatigalugit pitsaaneruseqarput, ingerlatsinissaq kissaatigaarput, allagartat akuersissutit ataatsimoortut pilersinneqartariaqarput, taamaalilluni aamma allaffissornikkut nassiussuinersuit pinngitsoorneqarsinnaangussamata. Ammalu aalisartunik piniartunillu utaqqisitsisarnerpassuit piunnaarlutik inuppalaartumik sullinneqarsinnaangornissaat anguneqassamat.

Suli qularnanngilaq aalisartut piniartullu allagartassaminnik pissarsisimangitsut arlaqassasut, neriutigaarpullu kommuninut nuunneqarpata amigaatillit pissarsiumaartut. Tassami kommunit innuttatik ilisarisisanerpaajuaat, aammalu qanimut aalisartut kattuffiit suleqatigineqalissapput tamannalu ajuunngilluinnarpoq.

Sinerissami aalisartut ilaatigut oqaatigineqarpoq amerlavallaartunngooq, taamatut oqartarneq isumaqatiginngilarput, sunami taava inuussutissarsiutigissagamikku apeqquq. pisortanik ikiorneqarneq apeqquq. uagut taanna naameerparput.

Taamatut oqaaseqarluta akuersaarlugu nuussinissaq aalisarnermi ataatsimiititaliami suliarineqarnissaa innersuussutigaarput.

Hans Enoksen